



Cussegl da vischnaunca  
17-2021/2024

# Revisiun parziala dallas statutas dil circuit da register funsil Cadi

## M E S S A D I

dalla suprastanza communal a al cussegl da vischnaunca

Preziau signur president  
Stimadas signuras cusseglieras  
Preziosi signurs cussegliers

### **1. Situaziun da partenza**

Al circuit da register funsil Cadi ein colligiadas las vischnauncas da Disentis/Mustér, Medel/Lucmagn, Sumvitg, Trun e Tujetsch. Cun il datum dils 11 d'uost 2020 ha igl uffeci funsil dalla Cadi historisau tuttas datas digitalas dil register funsil da Breil el sistem d'EED Capitastra e stizzau en siu register la vischnaunca da Breil. Dapi lu appartegn il register funsil dalla

vischnaunca da Breil agl uffeci funsil da Glion. Il circuit da register funsil Cadi ha per finamira d'instituir e da menar il register funsil dallas vischnauncas Disentis/Mustér, Medel/Lucmagn, Sumvitg, Trun e Tujetsch.

Las statutas dil circuit da register funsil Cadi dateschan digl onn 2007. Ils delegai (presidents communaux) dil circuit da register funsil Cadi han deliberau il sboz da revisiun alla radunonza da delegai dils 25 da november 2021.

Tenor art. 36 al 1 lit. k dalla constituziun communal dalla vischnaunca da Mustér cumpeta la decisiun davart l'appartenenza a corporaziuns da vischnauncas ed instituziuns regiunalas al cussegl da vischnaunca. Aschia schai era la suandonta revisiun parziala dallas statutas ella cumpetenza dil cussegl da vischnaunca.

## **2. Revisiun parziala**

La revisiun parziala risguarda las midadas dil dretg cantunal ch'ei succedidas ils davos onns. Da niev duei il fondo da reservas vegnir emplenius entochen ch'el contonscha il total da cuosts annuals d'in onn da fatschenta (ella media dils cuosts totals dils davos onns). Las pli impurtontas midadas cun igl artechel correspondent ein explicadas suandontamein (mira annexa cun adattaziuns):

Art. 2: Remplazzar las vischnauncas dil cumin dalla Cadi cun las vischnauncas da Disentis/Mustér, Medel/Lucmagn, Sumvitg, Trun e Tujetsch.

Art. 8: Strihar. Dil referendum facultativ han ins ella pratica mai fatg diever, aschia ch'ei drova buca quei instrument. Il quen annual ed il preventiv ein aunc mai stai dispiteivels e sche gie, duei quei esser cumpetenza dils delegai d'anflar ina sligaziun. Cun il dretg d'iniziativa eisi denton da tut temps pusseivel d'intervegnir (art. 6).

Art. 9: La repartiziun dallas vuschs per igl emprem onn (fundaziun) vegn buca pli duvrada ed aschia strihada. Il pot da total 100 vuschs vegn vinavon repartius annualmein tenor fatschentas dilucidadas (diember dils diaris) e las entradas recaltgadas ord talas el decuors dils davos tschun onns da gestiun.

Art. 22: El futur vegn mintg'onni mess minimal 10% en in fondo da reservas tochen che quel ha contonschiu in'altezia ella media dils cuosts totals dils davos onns da fatschenta digl uffeci funsil. Avon ei l'altezia stada limitada sin maximalmein frs. 200'000.--. Il fondo da reservas survescha per curclar eventuels deficits d'uffeci ni pretensiuns da responsabladad ch'ei buca curcladas dall'assicuranza.

Eventuels deficits d'uffeci vegnan finanziari en emprema lingia ord il fondo da reservas. Sch'il fondo da reservas croda sut frs. 200'000.-- vegn il deficit repartius tenor il diember da fatschentas dilucidadas e las entradas recaltgadas ord talas el decuors dils davos tschun onns.

Art. 24: Ils fegls dil cudisch principal, ils contracts ed ils bein immobiliars ein da segirar electronicamein. Il microfilm ei antiquau e vegn strihaus.

Art. 26: Davart la surdada digl incasso dils cuosts da terminaziun e mesiraziun agl uffeci da register funsil ei ella pratica mai vegniu fatg diever, aschia che alinea 3 duei vegnir strihada.

### 3. Fondo da reserva

Il saldo dallas reservas statutaras (capital agen) dil circuit da register Cadi pils 31 da december 2020 ha muntau a frs. 224'625.09. Il gudogn pils 31 da december 2020 da frs. 164'091.44 ei sunter ina reserva statutara (art. 22) da 10% (frs. 16'091.44) vegnius repartius sco suonda:

Vischnaunca	Entradas da taxas en frs.	En %	Contribuziun en frs.
Disentis/Mustér	177'673.64	29.2222 %	43'248.80
Medel/Lucmagn	44'758.40	7.3615 %	10'894.95
Sumvitg	94'439.32	15.5325 %	22'988.15
Tujetsch	184'326.80	30.3164 %	44'868.30
Trun	106'811.73	17.5674 %	25'999.80
<b>Total</b>	<b>608'009.89</b>	<b>100 %</b>	<b>148'000.00</b>

Schegie ch'ins havess igl onn 2020 buca pli stuiu far reservas, han ils delegai decidiu da metter ellas reservas 10% dil gudogn per aschia augmentar la segirtad finanziaria el cass dad onns da fatschenta cun in deficit. El futur vegn la remessa ellas reservas applicada aschi ditg entochen che quella contonscha in'altezia dils cuosts da fatschenta dad in onn, ella media dils cuosts totals dils davos onns da fatschenta digl uffeci funsil (rodund frs. 500'000.--). Igl ulteriur gudogn vegn repartius tenor pratica dils davos onns, numnadamein en proporziun dils recavs vid las taxas da register funsil dallas vischnauncas partecipadas al circuit da register.

### 4. Ponderaziuns finalas

A caschun dallas midadas dils davos onns (extrada vischnaunca Breil / adattaziuns dretg cantunal) ein las statutas vegnidas actualisadas. Las statutas van en vigur retroactivamein cun l'entschatta 2022.

### 5. Proposta

Sin fundament dallas ponderaziuns suramenziunadas

#### **p r o p o n a**

la suprastonza communal al cussegl da vischnaunca:

1. d'approbar la revisiun parziala dallas statutas dil circuit da register funsil Cadi.

Suprastonza communal Disentis/Mustér

Il president:

Il canzlist:

René Epp

Andri Hendry

Disentis/Mustér, ils 7 da fevrer 2022

- Statutas dil circuit da register funsil Cadi: Adattaziuns

- Statutas dil circuit da register funsil Cadi 2022